

廣

藝

舟

雙

楫

廣藝舟雙楫叙目、

自敘

可著聖道可發王制可洞人理可窮物變則刻鏤其精冥繇其形爲之也不効於聖道王制人理物變魁儒勿道也康子戊己之際旅京師淵淵然憂惓惓然思俛攬萬極塞鈍勿施格絀於時握髮墊然似人而非厥友告之曰大道藏於房小技鳴於堂高義伏於牀巧曩顯於鄉標枝高則隕風累石危則墜牆東海之鼈不可入於井龍伯之人不可釣於塘汝負畏壘之材取桀杙取欄檻安器汝汝不自克以程於窮固

宜哉且汝爲人太多而爲己太少徇於外有而不反  
於內虛其亦闇於大道哉夫道無小無大無有無無  
大者小之殷也小者大之精也螭螟之巢蚊睫螭螟  
之蜨又有巢者視虱如輪輪之中虱復傳緣焉三尺  
之畫七日遊不能盡其蹊徑也拳石之山丘壑巖巒  
竒深窅曲蟻蠓蚋生蛙蟻之衣蒙茸茂焉一滴之水  
容四大海洲島烟立魚龍波譎出日沒月方丈之室  
有百千億獅子廣座神鬼神帝生天生地反汝虛室  
遊心微密甚多國土人民豐實禮樂黼黻草木龍鬱  
汝神禪其中弟靡其側復何驚哉盍黔汝志勸汝心

息之以陰藏之無用之地以陸沈山林之中鐘鼓陳  
焉寂寞之野時聞雷聲且無用者又有用也不龜手  
之藥旣以治國矣殺一物而甚安者物物皆安焉蘇  
援一技而入微者無所往而不進於道也於是康子  
翻然捐棄其故洗心藏密冥神卻掃攤碑摘書弄翰  
飛素千碑百記鉤午是富發先識之覆疑竅後生之  
宦輿是無用於時者之假物以游歲莫也

國朝多言金石寡論書者惟涇縣包氏瓠之揚之今  
則孳之衍之凡爲二十七篇篇名如左

原書弟一

尊碑第二

購碑第三

體變第四

分變第五

說分第六

本漢第七

傳衛第八

寶南第九

備魏第十

取隋第十一

卑唐弟十二

體系弟十三

導源弟十四

十家弟十五

十六宗弟十六

碑品弟十七

碑評弟十八

餘論弟十九

執筆弟二十

綴法弟二十一

學敘弟二十二

述學弟二十三

榜書弟二十四

行草弟二十五

干祿弟二十六

論書絕句弟二十七

永惟作始於戊子之臘寔購碑於宣武城南南海館  
之汗漫舫老樹僵石證我古墨焉歸歟於己丑之臘  
迺理舊稿於西樵山北銀塘鄉之澹如樓長松敗柳  
侍我草元焉凡十七日至除夕述書訖光緒十五年

也述書者西樵山人康祖詒長素父也



廣藝舟雙楫卷一

原書第一

尊碑第一

購碑第三

原書第一

文字何以生也生於人之智也虎豹之強龍鳳之奇不能造爲文字而人獨能創之何也以其身峙立首函清陽不爲血氣之濁所熏故智獨靈也凡物中倒植之身橫立之身則必大愚必無文字以血氣熏其首故聰明弱也凡地中之物峙立之身積之歲年必有文字不獨中國有之印度有之歐洲有之亞非利

加洲之黑人澳大利亞洲之士人亦必有文字焉秘  
魯地裂其下有古城得前刼之文字於屋壁其文字  
如古虫篆不可識別故謂凡爲峙立之身曰人體者  
必有文字也以其智首出萬物自能製造不能自己  
也

文字之始莫不生於象形物有無形者不能窮也故  
以指事繼之理有憑虛無事可指者以會意盡之若  
諧聲假借其後起者也轉注則劉歆創例古者無之  
倉沮創造科斗虫篆文必不多皆出象形見於古籀  
者不勝僂數今小篆之日月山川水火艸木面首馬

牛象鳥諸文必倉頡之遺也匪惟中國然外國亦莫不然近年埃及國掘地得三千年古文字郭侍郎嵩燾使經其地購得數十搨本文字酷類中國科斗虫篆率皆象形以此知文字之始於象形也

以人之靈而能創爲文字則不獨一創已也其靈不能自己則必數變焉故由虫篆而變籀由籀而變秦分即小篆由秦分而變漢分自漢分而變眞書變行草皆人靈不能自己也

古文爲劉歆僞造雜採鐘鼎爲之

余有新學僞經水考辨之已詳

經注傳臨淄人有發齊胡公之銅棺其前和隱起爲

文惟三字古文餘同今書子思稱今天下書同文蓋  
今隸書卽蒼頡篇中字蓋齊魯間文字孔子用之後  
學行焉遂定於一若鐘鼎所採自是春秋戰國時各  
國書體故詭形奇製與倉頡篇不同也許慎說文敘  
謂諸侯力政不統於王言語異聲文字異形今法德  
俄文字皆異可以推古矣但以之亂經則非孔子文  
字不能不辨若論筆墨則鐘鼎雖僞自不能廢耳

王愔敘百二十六種書體於行草之外備極殊詭按

佛本行經云尊者闍黎教我何書

自下太子廣爲說書

或復梵

天所說之書

今婆羅門書王有四十音是

佉盧虱叱書

隋言驢唇

富沙

迦羅仙人說書

隋言華果

阿迦羅書

隋言節分

管迦羅書

隋言吉祥

邪寐尼書

隋言大秦國書

鴛瞿梨書

隋言指言

耶那尼迦書

隋言馱書

娑伽羅書

隋言特牛

波羅婆尼書

隋言樹葉

波流沙書

隋言惡言父

與書毗多茶書

隋言起尸

陀毗茶國書

隋言天竺

脂羅低書

隋言形人

度其差那婆多書

隋言右旋

優波伽書

隋言嚴熾

僧佉

書

隋言等計

阿婆勿陀書

隋言覆

阿菟盧摩書

隋言順

毗耶寐

奢羅書

隋言雜

陀羅多書

隋言鳥場

西瞿耶尼書

隋言須彌

阿沙

書

隋言勒支那國書

摩那書

隋言斗科

末茶叉羅書

隋言中毗多

悉底書

隋言尺

富敷波書

隋言華

提婆書

隋言天

那羅書

隋言龍

夜叉書

乾闥婆書

隋言天音

阿脩羅書

隋言不飲

迦羅婁書

隋言金翅

緊那

羅書非摩喉羅伽書天彌伽遮迦書諸迦迦婁多

書鳥浮摩提婆書地居安多梨又提婆書虛鬱多

羅拘盧書須彌通婁婆毗提訶書須彌烏差婆書舉

膩差婆書擲娑伽羅書海跋闍羅書金梨伽波羅低

犁伽書往毗棄多書食阿菟浮多書未奢娑多羅

跋多書如伏伽那那跋多書等優差波跋多書舉尼

差波跋多書擲波陀梨佉書上毗拘多羅波陀那地

書從二增耶婆陀輸多羅書增上句末茶婆晒尼書

中梨沙邪婆多波侈比多書諸山陀羅尼卑又梨書

觀伽伽那卑麗又尼書觀虛薩蒲沙地尼山陀書一

藥草

沙羅僧伽何尼書

總覽

薩婆章多書

一切種音

三藏記

云先覺說有六十四種書鹿輪轉眼神鬼八部惟梵及佉樓爲勝文西陽雜俎所攷有驢肩書蓮葉書節分書大秦書馱乘書牂牛書樹葉書起尸書右旋書覆書天書龍書鳥音書凡六十四種然則天竺古始書體更繁非獨中土有虫籀繆填之殊芝英倒薤之異其製作紛紜亦所謂人心之靈不能自己也

隋志稱婆羅門書以十四字貫一切音文省義廣蓋天竺以聲爲字涅槃經有二十五字母華嚴經有四十字母今通志七音略所傳天竺三十六字母所變

化各書猶可見也唐古忒之書出於天竺元世祖中  
統元年命國師八思巴製蒙古新字千餘母四十一  
皆相關紐則採唐古忒與天竺爲之亦迦盧之變相  
也我

朝達文成公又採唐古忒蒙古之字變化而成

國書至乾隆時於是製成清篆亦以聲而演形並託  
音爲字者然印度之先亦必以象形爲字未必能遽  
合聲爲字其合聲爲字必其後起也遼太祖神冊五  
年增損隸書之半製契丹大字金太祖命完顏希尹  
依倣楷書因契丹字合本國語爲國書西夏李元昊



命野利仁榮演書成十二卷體類八分此則本原於形非自然而變者本無精義自立故國亡而書隨之也

歐洲通行之字亦合聲爲之英國字母二十六法國二十五俄德又各殊然其始亦非能合聲爲字也其至古者有阿拉伯文字變爲猶太文字焉有敘利亞文字巴比倫文字埃及文字希利尼文字變爲拉丁文字焉又變爲今法英通行之文字焉此亦如中國籀篆分隸行草之展轉相變也且彼又有篆分正斜大小草之異亦其變之不能自己也

夫變之道有二不獨出於人心之不容已也亦由人情之競趨簡易焉繁難者人所共畏也簡易者人所共喜也去其所畏導其所喜握其權使人之趨之若決川於堰水之坡沛然下行莫不從之矣几席易爲牀榻豆登易爲盤碗琴瑟易以箏琶皆古今之變於人便利隸草之變而行之獨久者便易故也鐘表興則壺漏廢以鐘表使人能懸於身知時者未有捨鐘表之輕小而佩壺漏之累重也輪舟行則帆船廢以輪舟能速致跨海者未有捨輪舟之疾速而樂帆船之遲鈍也故謂變者天也

梁釋僧祐曰造書者三人長曰梵書右行次佉樓左  
行少倉頡下行其說雖謬然文字之製欲資人之用  
耳無中行左右行之分也人圓讀不便於手倒讀不  
便於目則以中行為宜橫行亦可爲用人日本橫則  
橫行收攝爲多目睛實圓則以中行直下爲順以此  
論之中行為優也安息書革旁行以爲書記安息卽  
今波斯也回回字右行泰西之字左行而中國之書  
中行此亦先聖格物之精也然每字寫形必先左後  
右數學書亦有橫列者則便於右手之故蓋中國亦  
兼左行而有之但右行實於右手大不順爲最愚下

耳

中國自有文字以來皆以形爲主卽假借行草亦形也惟諧聲略有聲耳故中國所重在形外國文字皆以聲爲主卽分篆隸行草亦聲也惟字母略有形耳中國之字無義不備故極繁而條理不可及外國之字無聲不備故極簡而意義亦可得蓋中國用目外國貴耳然聲則地球皆同義則風俗各異致遠之道以聲爲便然合音爲字其音不備牽強爲多不如中國文字之美備矣

天竺開國最先創音爲書亦最先故戎蠻諸國悉因

之西域記偁跋祿迦國字源三十餘羯霜那國健馱  
羅國有波爾尼仙作爲字書備有千頌頌三十言究  
極古今總括文書八紘外史及今四譯館所載淳泥  
文萊蘇祿暹羅呂宋諸國書皆合聲爲字體皆右行  
並本原於梵書日本國書字母四十有七用中國草  
書爲偏旁而以音貫之亦梵之餘裔也

聲學盛於印度故佛典曰我家真教體清淨在音聞  
又以聲聞爲一乘其操聲爲咒能治奇鬼異獸蓋聲  
音之精也唐古忒蒙古及泰西合聲爲字之學莫不  
本於印度焉

泰西治教皆出天竺子  
別有論此變之大者也

綜而論之書學與治法勢變略同周以前爲一體勢  
漢爲一體勢魏晉至今爲一體勢皆千數百年一變  
後之必有變也可以前事驗之也今用真楷吾言真  
楷

或曰書自結繩以前民用雖篆草百變立義皆同由  
斯以談但取成形令人可識何事誇鍾衛講王羊經  
營點畫之微研悅筆札之麗令祁祁學子玩時日於  
臨寫之中敗心志於碑帖之內乎應之曰衣以揜體  
也則袒裼足蔽何事采章之觀食以果腹也則糗藜  
足飫何取珍羞之美垣牆以蔽風雨何以有雕粉之

璀璨舟車以越山海何以有幾組之陸離詩以言志  
何事律則欲諧文以載道胡爲辭則欲巧蓋凡立一  
義必有精粗凡營一室必有深淺此天理之自然匪  
人爲之好事楊子雲曰斷木爲棊椀革爲鞠皆有法  
焉而况書乎昔唐太宗屈帝王之尊親定晉史御撰  
之文僅羲之傳論此亦藝林之美談也况茲書譜講  
自前修吾既不爲時用其他非所宜言飽食終日無  
所用心因搜書論略爲引伸僕子臨池或爲識途之  
助若告達識則吾豈敢

尊碑弟二

晉人之書流傳曰帖其真蹟至明猶有存者故宋元明人之爲帖學宜也夫紙壽不過千年流及

國朝則不獨六朝遺墨不可復覩卽唐人鈎本已等鳳毛矣故今日所傳諸帖無論何家無論何帖大抵宋明人重鈎屢翻之卒名雖義獻面目全非精神尤不待論譬如子孫曾[玄]雖出自某人而體貌則迥別國朝之帖學薈萃於得天石菴然已遠遜明人況其他乎流敗旣甚師帖者絕不見工物極必反天理固然道光之後碑學中興蓋事勢推遷不能自己也乾隆之世已厭舊學冬心板橋參用隸筆然失則怪



此欲變而不知變者汀洲精于八分以其八分爲眞書師仿弔比干文瘦勁獨絕懷寧一老實丁斯會旣以集篆隸之大成其隸楷專法六朝之碑古茂渾朴實與汀洲分分隸之治而啟碑法之門開山作祖允推二子卽論書法視覃谿老人終身歐虞褊隘淺弱何啻天壤邪吾粵吳荷屋中丞帖學名家其書爲吾粵冠然窺其筆法亦似得自張黑女碑若懷寧則得於崔敬邕也

阮文達亦作舊體者然其爲南北書派論深通此事知帖學之大壞碑學之當法南北朝碑之可貴此蓋

通人達識能審時宜辨輕重也惜見碑猶少未暇發  
搗猶土鼓蕢桴椎輪大輅僅能伐木開道作之先聲  
而已

碑學之興乘帖學之壞亦因金石之大盛也乾嘉之  
後小學最盛談者莫不藉金石以爲攷經證史之資  
專門搜輯著述之人旣多出土之碑亦盛於是山岩  
屋壁荒野窮郊或拾從耕父之耒或搜自官厨之石  
洗濯而發其光采摹搨以廣其流傳若平津孫氏侯  
官林氏偃師武氏青浦王氏皆緝成巨帙徧布海內  
其餘爲金石存金石契金石圖金石志金石索金石

聚金石續編金石補編等書殆難悉數故今南北諸碑多嘉道以後新出土者卽吾今所見碑亦多金石萃編所未見者出土之日多可證矣出碑旣多考證亦盛于是碑學蔚爲大國適乘帖微入續大統亦其宜也

涇縣包氏以精敏之資當金石之盛傳完白之法獨得蘊奧大啟秘藏箸爲安吳論書表新碑宣筆法於是此學如日中天迄於咸同碑學大播三尺之童十室之社莫不口北碑寫魏體蓋俗尙成矣

今日欲尊帖學則翻之已壞不得不尊碑欲尙唐碑

則磨之已壞不得不尊南北朝碑尊之者非以其古也筆畫完好精神流露易於臨摹一也可以攷隸楷之變二也可以攷後世之源流三也唐言結構宋尙意態六朝碑各體畢備四也筆法舒長列入雄奇角出迎接不暇實爲唐宋之所無有五也有是五者不亦宜於尊乎

購碑第三

學者欲能書當得通人以爲師然通人不可多得吾爲學者尋師其莫如多購碑刻乎楊子雲曰能觀千劍而後能劍能讀千賦而後能賦仲尼子輿論學必

先博學詳說夫耳目隘陋無以備其體裁博其神趣  
學烏乎成若所見博所臨多熟古今之體變通源流  
之分合盡得於目盡存於心盡應於手如蜂採花醞  
釀久之變化縱橫自有成效斷非枯守一二佳本蘭  
亭醴泉所能知也右軍自言見李斯曹喜梁鵠蔡邕  
石經張昶華岳碑徧習之是其師資甚博豈師一衛  
夫人法一宣示表遂能範圍千古哉學者若能見千  
碑而好臨之而不能書者未之有也

千碑不易購亦不易見然則如何曰握要以圖之擇  
精以求之得百碑亦可成書然言百碑其約至矣不

能復更少矣不知其要不擇其精雖見數百碑猶未足語於斯道也吾聞人能書者輒言寫歐寫顏不則言寫某朝某碑此眞謬說令天下人終身學書而無所就者此說誤之也至寫歐則專寫一本寫顏亦專寫一本欲以終身此尤謬之尤謬誤天下學者在此也

又有謂學書須專學一碑數十字如是一年數月臨寫千數百過然後易一碑又一年數月臨寫千數百過然後易碑亦如是因舉鍾元常入抱犢山三年學書永禪師學書四十年不下樓爲例此說似矣亦謬

說也夫學者之於文藝末事也書之工拙又藝之至微下者也學者畜德器窮學問其事至繁安能以有用之歲月耗之于無用之末藝乎誠如鍾永又安有暇日涉問學哉此殆古者欺人耳吾之術以能執筆多見碑爲先務然後辨其流派擇其精奇惟吾意之所欲以時臨之碑臨旬月徧臨百碑自能釀成一體不期其然而自然者加之熟巧申之學問已可成家雖天才驚下無不有立若其淺深高下則仍視其人耳

購碑當知握要以何爲要也曰南北朝之碑其要也

南北朝之碑無體不備唐人名家皆從此出得其本  
矣不必復求其末下至于祿之體亦無不兼存故唐  
碑可以緩購且唐碑名家之佳者如率更之化度九  
成宮皇甫君虞恭公秘書之廟堂碑河南之聖教序  
孟達法師魯公之家廟麻姑壇多寶塔元結郭家廟  
臧懷恪殷君八關齋李北海之雲麾將軍靈巖東林  
寺端州石室徐季海之不空和尚柳誠懸之元秘塔  
馮宿諸碑非原石不存則磨翻壞盡稍求元明之舊  
搨不堪入目已索百金豈若以此一本之貲盡購南  
北朝諸碑乎若捨諸名家佳本而雜求散碑則又本



未倒置昧于源流且佳碑如樊府君充公頌裴鏡民者實寡小唐碑中頗多六朝體是其沿用未變法者原可採擇惟意態體格六朝碑皆已備之唐碑可學者殊少卽學之體格已卑下也故唐碑可緩購

今世所用號稱真楷者六朝人最工蓋承漢分之餘古意未變質實厚重宕逸神雋又下開唐人法度草情隸韵無所不有晉帖吾不得見矣得盡見六朝佳碑可矣故六朝碑宜多購

漢分爲真楷之源以之攷古固爲學問之事卽論書法亦當考索源流宜擇其要購之若六朝之隸無多

唐隸流傳日卑但略見之知流變足矣可不購

漢分旣擇求唐隸在所不購則自晉魏至隋其碑不多可以按金石萃編金石補編金石索金石聚而求之可以分各省存碑而求之然道咸同光新碑日出箸錄者各有不盡學者或限於見聞或困於才力無以知其目而購之知其目矣慮碑之繁多搜之而無盡也吾爲說曰六朝碑之雜沓繁冗者莫如造像記其文義略同所足備攷古者蓋鮮陳陳相因殊爲可厭此蓋出土之日新不可究盡者也造像記中多佳者然學者未能擇也姑俟碑銘盡搜之後乃次擇採

之故造像記亦可緩購

去唐碑去散隸去六朝造像記則六朝所存碑銘不  
過百餘兼以秦漢分書佳者數十本通不過二百餘  
種必盡求之會通其源流浸淫于心目擇吾所愛好  
者臨之厭則去之臨寫既多變化無盡方圓操縱融  
治自成體裁韵味必可絕俗學者固可自得之也秦  
漢分目略見所說說分本漢篇中今將南北朝碑目  
必當購者錄如左其碑多新出爲金石諸書所未有  
者也造像記佳者亦附目間下論焉

碑以朝別以年敘其無可攷附於其朝之後

有年則書不書者無年月也

書人詳之撰人不詳重在書也

石所存地著之不著者不知所在也

其碑顯者書人名不顯者并官書之欲人易購也

吳碑

葛府君碑額

江蘇句容

九真太守谷朗碑

鳳皇元年

晉碑

南鄉太守鄒休碑

太始六年

保母志 興寧三年 王獻之書

枳陽府君碑 隆安三年

黹寶子碑 太亨四年

按安帝元興元年改元太亨次年復爲元興四年  
已改義熙元年此碑蓋在偏遠未知故仍書太亨  
四年也

孝女曹娥碑 元嘉元年 明人傳爲王羲之書姑塢  
於此海山仙館刻石

宋碑

甯州刺史爨龍顏碑 大明二年 雲南陸源  
有碑陰

始康郡晉豐縣口熊造像 元朝廿五年 山東王氏

高勾麗故城刻石 已丑年長壽王當宋元嘉六年  
平壤吳氏

齊碑

吳郡造維衛尊佛記 永明六年 浙江會稽

信仙弟子蕭衍造像題字 永元二年 四川雲陽

梁碑

太祖文皇帝神道東闕 反刻

太祖文皇帝神道西闕

南康簡王神道東闕 反刻

南康簡王神道西闕

臨川靖惠王神道東闕 反刻

臨川靖惠王神道西闕

吳平忠侯蕭公神道東闕 反刻

吳平忠侯蕭公神道西闕

始興忠武王碑

有額有陰

散騎常侍安平王碑

天監五年殘碑

鄱陽王益州軍府人題記 天監十二年 四川雲陽

石井闌題字 天監十五年 江蘇句容

章景爲梁主造佛依碑石像 丁未年卽大通元年 四川綿州

許善題名 大通三年 四川綿州

口口口等造觀世音像 口通三年 四川綿州

口道口造像 口口三年 四川綿州

劉敬造像 大同三年 山東福山王氏

讚觀音 與大通元年石同 四川綿州

釋慧影爲父母師僧及身造釋迦佛像題字 中大同元年浙

江石門  
李氏

陳碑

新羅眞興大王巡狩管境碑 戊子年眞興王麥宗陳  
光大二年也 朝鮮咸

興

趙和造像記 永定三年

魏碑



邑主秦從州人造像王銀堂畫像題名道武天賜三年

鞏伏龍造像大魏國元年即大武延和元年

定州中山趙珣造像皇興三年

中岳嵩高靈廟碑太安二年 寇謙之書 篆額陽文有陰

宕昌公暉福寺碑太和十二年 陝西澄城 有碑陰

孝文皇帝弔殷比干墓文皇祐遷中元載歲御次閏 茂望舒

孫秋生造像太和七年 以下為龍門二十品故合 錄之

始平公造像太和十二年 朱義章書 有額

北海王元詳造像太和十八年

北海王太妃高為孫保造像

長樂王夫人尉遲造像 太和十九年

一弗造像 太和廿年

解伯達造像 太和年造

楊大眼造像

魏靈藏造像

鄭長猷造像 景明二年

惠感造像 景明三年

賀蘭汗造像 景明三年

高樹造像 景明三年

法生造像 景明四年

太妃侯造像 景明四年

安定王元燮造像 正始四年

平乾虎造像 正始四年

道匠造像 無年月

齊郡王祐造像 熙平二年

慈香造像 神龜三年

優填王造像

泰山羊祉開復石門銘 永平二年 太原典籤王遠書

左授合賈三德開復石門題記

司馬元興墓志 永平四年

鄭文公碑

永平四年  
有上下二碑

鄭道昭書

拊雲峯山石刻四十二種  
不詳列

仙和寺造像  
永平四年

楊翬碑

延昌元年  
有額  
直隸唐山

司馬景和妻孟敬訓墓志銘

延昌三年  
河南孟縣

刁遵墓志銘

熙平元年  
直隸南皮張氏

兗州賈使君碑

神龜二年

趙阿歡造像

神龜三年

司馬晒墓志銘

正光二年

張猛龍清頌碑

正光三年  
有額有陰

樊可憺碑 正光二年

鄭道忠墓志 正光三年

馬鳴寺根法師碑 正光四年  
有額

高貞碑 正光四年  
篆額陽文

涇州刺史陸希道墓志蓋 正光四年  
篆書 河南孟縣

鞠彥雲墓志 正光四年  
有蓋

李超墓志銘 正光五年

吳高黎墓志 孝昌二年

六十人造像 孝昌三年

劉玉墓志銘 孝昌三年

張玄墓志

普泰元年

元匡造泗津橋堰石人題記

皇甫麟墓志

殘碑口軍司馬治外兵曹張顥口題名

碑側有邑子趙軌等殘字

殘碑豆陵苟邑題名

有碑側

蘭獻伯高懷玉題名

韓顯祖造像

永熙二年

元萇振興溫泉頌

篆額陽文

惠輔造像

張法壽造像

天平二年

嵩陽寺倫統碑石銘

天平二年  
隸書篆額

司馬昇墓志

天平二年

法顯造像

天平三年

法堅法榮二比丘僧碑

天平四年

山東泰安

李憲墓志

元象元年

直隸保定

高湛墓志銘

元象二年

禪靜寺刹前敬使君銘

興初二年

惠詮造像

建義元年

李仲璇修孔子廟碑

興和三年  
篆額

王長儒書

張奢碑

興和三年

靈壽埠安村寺

王盛碑 興和三年

王偃墓志銘 武定元年  
有篆蓋

朱、永隆、唐豐等造天宮碑 武定三年 河南

邑王敬造石像碑文 武定六年

義橋石像之碑 武定七年  
有側有陰

冀州刺史關勝誦德碑 武定八年

源義虎曾孫磨耶壙頭祇桓記 武定八年

王僧碑

北齊碑

邑子曹師石象碑 天保三年



崔顥墓志 天保四年

西門豹碑頌 隸書

并州主簿王璘妻趙氏墓志 天保六年有額

趙郡王修定國寺碑 天保八年有額

朱氏造像 天保八年有大字小字二碑

夫子廟碑 乾明元年隸書篆額

比丘僧邑義造像殘記 乾明元年有側

隼修羅碑 皇建元年有額

石柱頌 太寧二年八面隸書

雲門法勤禪師塔銘 太寧三年

天柱山銘

天統元年

鄭述祖撰書

姜元略造像

天統元年

房周陔墓志

天統元年

山東濰縣郭氏

魏元預造象

天統元年

邑義六十人碑頌

天統五年  
隸書

百人造象記

天統五年碑長丈餘甚完好瘦硬中有  
腴氣登善之祖也

趙崇仙造象

天統六年

定州刺史鄒珎之碑

隸書有側

映佛岩摩崖

武平元年

隴東王感孝頌

武平元年

梁恭之隸書

朱岱林墓志銘

武平元年  
有額

道略五百人造像

瘦硬完好齊碑上品

晉昌王唐邕寫經碑

武平三年  
隸書

臨淮王象碑

武平四年  
隸書

功曹李琮墓志

武平五年  
有側

靈塔銘

武平五年

等慈寺殘碑

武平五年

尼圓照造像

報德象碑

武平六年

釋仙書

馬天祥造像

武平六年

陳留太守墓志殘石是石出土掘一紙復埋之海內無二本姑附錄之

豫州刺史紱子彥墓志武平

張思文造像承光元年

公孫文哲造像

華嚴經菩薩明難品有千餘字腴整

鼓山石經

北周碑

強獨樂樹文王碑元年丁丑

賀屯植墓志保定四年

西岳華山廟碑天和二年 趙文淵書篆額

曹恪碑 天和五年

時珍墓志 宣政元年

光州刺史宇文公碑銘

李峻卜居記 建德元年

隋碑

豆盧通造大像記殘石 開皇二年 直隸正定府崇因寺

趙芬碑殘石 開皇五年 二石

仲思那卅人造橋碑 開皇六年 有額

龍藏寺碑 開皇六年

王暉兒造像 有穆子容碑氣

石窟寺修佛經石像碑

開皇十三年

曹子建碑

開皇十三年

惠雲法師墓志

開皇十四年

聿賓墓志

開皇十五年  
篆蓋

荆孝禮墓志

開皇十五年

賀若誼碑

開皇十六年  
篆額

李氏像碑頌

開皇十六年  
篆額

張通妻陶墓志

開皇十七年

美人董氏墓志

開皇十七年

安喜公李使君碑

開皇十七年  
篆額

龍山公臧質墓志

開皇二十年

澧水石橋壘文碑

開皇口年  
篆額

青州勝福寺舍利塔下銘

仁壽元年  
有額

孟弼隸書

孔文宣靈廟碑

仁壽元年  
隸書篆額完好

信州金輪寺塔下銘

仁壽二年

蘇慈墓志銘

仁壽三年

鄧州大興國寺舍利塔下銘

仁壽二年

曹禮墓志

磨厓仁口口年

儀同王君墓志

大業元年

直隸定州

劉玕墓志

大業二年  
隸書有側有銘

唐高祖爲太宗造像 大業二年

吳儼墓志 大業四年 篆蓋

甯贊碑 大業五年 有額

修孔子廟碑 大業七年 隸書篆額

李君謩造像 大業七年

姚辨墓志銘 大業七年 歐陽詢書 宋人重刻

元智墓志銘 大業十一年

太僕卿夫人姬氏墓志 大業十一年

宋永貴墓志 大業十二年

隆山郡勝業道場碑



德陽公梁公碑

篆額

河東首山郡勝業道場舍利塔銘

篆額

青州藏碑殘石

李靖上西岳文

宋人僞作然董道以爲大業末年則亦出土久矣

曹文宗殘碑

岡山摩崖

魏齊周隋皆有摩崖而齊尤多包慎伯所偶般若經卽在摩崖中也今附於末焉

尖山摩崖

鐵山摩崖

凡所次目皆爲窮鄉學子欲學書法未知碑目言之若大雅宏達金石名家扇歐趙之餘風集琳瑯之萬

品諸朝著錄旁採遼金內地網羅遠泊蕃外自能著  
書無煩芹獻凡所著目約之已甚若猶畏其繁多慮  
披採之不易臨寫之難徧雜冗亂目無從下手則更  
擇其精者若碑品之所列流派之所論選舉既嚴別  
白益審必當盡購而熟觀之若諸碑之未見家法之  
未熟而遽欲言書書乎書乎匪吾攸聞

廣藝舟雙楫卷一終

弟子林奎陳和澤初校  
弟子梁健康徐勤覆校

廣藝舟雙楫卷二

體變弟四

分變弟五

說分弟六

本漢弟七

體變弟四

人限於其俗俗各趨於變天地江河無日不變書其  
至小者鐘鼎及籀字皆在方長之間形體或正或斜  
各盡物形奇古生動章法亦復落落若星辰麗天皆  
有奇致鐘鼎古文雖爲劉歆偽造而所採多春秋戰  
國舊物故奇古可愛攷據經義則闢之至於  
筆畫之工則不秦分篆即小裁爲整齊形體增長蓋始  
能以人廢也

變古矣然瑯琊秦書茂密蒼深當爲極則自此日變

若趙王上壽泮池刻石墳壇刻石下逮少室開母廟  
建初殘碑三公山是吾碑體皆方扁筆益茂密至褒  
斜鄙閣裴岑尊榼閣仙友等碑變圓爲方削繁成簡  
遂成漢分而秦分筆未亡建初以後變爲波磔篆隸  
迥分於是衡方乙瑛華山石經曹全等碑體扁已極  
波磔分背隸體成矣夫漢自宣成而後下逮明章文  
皆似駢似散體製難別明章而後筆無不儷句無不  
短駢文以成散文篆法之解散駢文隸體之成家皆  
同時會可以觀世變矣

漢末波磔縱肆極矣久亦厭之又稍參篆分之圓變

爲眞書今觀元常諸帖三國諸碑皆破觚爲圓以茂  
密雄強爲美復進爲分書勢所倚毛宏之  
八分增損此也此如駢體  
之極復尙古文而駢散之分經數變之後自是不可  
復合矣

吾謂書莫盛於漢非獨其氣體之高亦其變製最多  
皋牢百代杜度作草蔡邕作飛白劉德昇作行書皆  
漢人也晚季變眞楷後世莫能外蓋體製至漢變已  
極矣

南碑絕少以帖觀之鍾王之書豐強穠麗宋齊而後  
日即纖弱梁陳媚好無復雄強之氣

北碑當魏世隸楷錯變無體不有綜其大致體莊茂而宕以逸氣力沉著而出以澀筆要以茂密爲宗當漢末至此百年今古相際文質斑斕當爲今隸之極盛矣

北齊諸碑率皆瘦硬千篇一律絕少異同

北周文體好古其書亦古多參隸意至於隋世率尙整朗綿密瘦健清虛之風一掃而空豈宙合不分光岳晴霽氣運有當爾邪南北書派自是遂合故隋之爲書極盛以結六朝之局是亦一大變焉

唐世書凡三變唐初歐虞褚薛王陸並轡疊軌皆尙

爽健開元御宇天下平樂明皇極豐肥故李北海顏  
平原蘇靈芝輩並趨時主之好皆宗肥厚元和後沈  
傳師柳公權出矯肥厚之病專尙清勁然骨存肉削  
天下病矣

夫唐人雖宗二王而專講結構則北派爲多然名家  
變古實不盡守六朝法度也五代楊凝式李建中亦  
重肥厚宋初仍之至韓魏公東坡猶然則亦承平之  
氣象邪宋偁四家君謨安勁紹彭和靜黃米復出意  
態更新而偏斜拖沓宋亦遂亡南宋宗四家筆力則  
稍弱矣

遼書樸拙絕無文采與其國俗略同金世碑帖專學大蘇蓋趙閑閑李屏山之學慕尙東坡故書法亦相仿效遂成俗尙也今京朝士夫多慕蘇體豈亦有金之遺俗邪

元明兩朝言書法者日盛然元人吳興首出惟伯機實與齊價文原和雅伯生渾朴亦其亞也惟康里子山奇崛獨出自餘揭曼碩柯敬仲倪元鎮雖有道媚皆吳興門庭也自是四百年間文人才士縱極馳騁莫有出吳興之範圍者故兩朝之書率姿媚多而剛健少香光代興幾奪子昂之席然在明季邢侗子愿



張瑞圖二水

董米萬鐘

四家並名香光僅在四家之

中未能續一統緒又王覺斯飛騰跳擲其間董實未勝之也至我

朝

聖祖酷愛董書臣下摹仿遂成風氣思白於是祀夏配天汲汲乎欲祧吳興而尸之矣香光俊骨逸韻有足多者然局束如轅下駒蹇怯如三日新婦以之代統僅能如晉元宋高之偏安江左不失舊物而已然明人類能行草其絕不知名者亦有可觀蓋帖學大行故也

國朝書法凡有四變康熙之世專仿香光乾隆之代競講子昂率更貴盛於嘉道之間北碑萌芽於咸同之際至於今日碑學益盛多出入於北碑率更間而吳興亦蹀躞件食焉吾今判之書有古學有今學古學者晉帖唐碑也所得以帖爲多凡劉石菴姚姬傳等皆是也今學者北碑漢篆也所得以碑爲主凡鄧石如張廉卿等是也人未有不爲風氣所限者制度文章學術皆有時焉以爲之大界美惡工拙祇可於本界較之學者通於古今之變以是二體者觀古論時其致不混焉若後之變者則萬年浩蕩杳杳無涯

不可以耳目之私測之矣

分變第五

文字之變流皆因自然非有人造之也南北地隔則音殊古今時隔則音亦殊蓋無時不變無地不變此天理然當其時地相接則轉變之漸可攷焉文字亦然漢志稱史籀篇者周時史官教學童書也與孔氏壁中古文異體則非劉歆僞體爲周時真字也其體則今石鼓及說文所存籀文是也然則孔子之書六經藏之於孔子之堂分寫於齊魯之儒皆是秦之爲篆不過體勢加長筆畫略減如南北朝書體之少異

蓋時地少移因籀文之轉變而李斯因其國俗之舊  
頒行天下耳觀石鼓文字與秦篆不同者無幾王筠  
所謂其盤災敢棄知文同籀法是也今秦篆猶存者  
有瑯琊刻石泰山刻石會稽刻石碣石門刻石皆李  
斯所作以爲正體體並圓長而秦權秦量即變方扁  
漢人承之而加少變體在篆隸間以石攷之若趙王  
上壽刻石爲趙王遂廿二年當文帝後元六年魯王  
泮池刻石當宣帝五鳳二年體已變矣然絕無後漢  
之隸也至厲王中殿刻石幾於隸體然無年月江藩  
定爲江都厲王尙不足據左方文字莫辨補訪碑錄

審爲元鳳二字金石萃編疑爲保歲庶等字則元鳳固不確也金石聚有鳳凰畫象題字體近隸書金石聚以爲元狩年作江陰繆荃蓀謂當從補訪碑錄釋爲元康則晉武帝時隸也庶孝禹碑爲河平三年則同治庚午新出土者亦爲隸順德李文田以爲僞作無疑也葉子侯封田刻石爲始建國天鳳三年亦隸書嘉慶丁丑新出土前漢無此體蓋亦僞作則西漢未有隸體也降至東漢之初若建平郾縣石刻永光三處閣道石刻開通褒斜道石刻裴岑紀功碑石門殘刻郝閣頌戚伯著碑楊淮表紀皆以篆筆作隸者

北海相景君銘曳腳筆法猶然若三公山碑是吾碑  
皆由篆變隸篆多隸少者吳天發神識猶有此體若  
三老通碑尊健閣記爲建武時碑則由篆變隸篆多  
隸少者以漢鐘鼎攷之唯高廟都倉孝成上林諸鼎  
有秦隸意汾陰好峙則似秦權至於太官鐘周楊侯  
銅丞相府漏壺慮僂尺若食官鐘銘綏和鐘銘則體  
皆扁繆在篆隸之間矣今焦山陶陵鼎銘其體方折  
與啟封鐙及王莽嘉量同爲天發神識之先聲亦無  
後漢之隸體者以瓦當攷之秦瓦如維天降靈甲天  
下大萬樂當嵬氏冢當蘭池宮當延年瓦方春萌芽

等瓦爲圓篆至於漢瓦若金字樂字延年上林右空  
千秋萬歲漢并天下長樂未央上林甘泉延壽萬歲  
高安萬世萬物咸成狼千萬延宣靈萬有喜萬歲長  
樂萬歲長生無極千秋長安長生未央永奉無疆平  
樂阿宮億年無疆仁義自成揜衣中庭上林農宮延  
年益壽體兼方圓其轉嬰柞舍六畜蕃息及便字瓦  
則方折近鄙閭矣蓋西漢以前無熹平隸體和帝以  
前皆有篆意其漢縣有竟寧建平泰阿房瓦西凡廿  
九六月官入字純作隸體恐不足據蓋自秦篆變漢  
隸減省方折出於風氣遷變之自然許慎說文敘詆

今學謂諸生競逐說字解經誼稱秦之隸書爲蒼頡時書云父子相傳何得改易蓋是漢世實事自蒼頡來雖有省改要由遷變非有人改作也吾子行曰崔子玉寫張平子碑多用隸法不合說文卻可入印全是漢人篆法故也桂未谷曰說文所無之字見於繆篆者不可枚舉繆篆與隸相通各爲一體原不可以說文律之蓋子玉所寫之隸法說文所無之繆篆皆今學家師師相傳舊字舊體展轉傳變可見也志乃謂秦時始建隸書起於官獄多事苟趨省易施之於徒隸許慎又謂程邈所作蓋皆劉歆僞撰古文欲黜



今學故以徒隸之書比之以重辱之其實古無籀篆隸之名但謂之文耳創名而抑揚之實自歆始且孔子五經中無籀篆隸三字唯僞周官最多則用莊子韓非子者又卿乘篆車此亦歆意也於是篆隸之名行於二千年中不可破矣夫以篆隸之名承用之久驟而攻之鮮有不河漢者吾爲一證以解之今人曰作真書興於魏晉之世無一人能指爲誰作者然則風氣所漸移非關人爲之改作矣東漢之隸體亦自然之變然漢隸中有極近今真楷者如高君闕故益州舉廉丞貫等字陽都字之邑旁直是今真書尤似

顏真卿攷高頤碑爲建安十四年此闕雖無年月當同時也張遷表頌其筆畫直可置今真楷中楊震碑似褚遂良筆蓋中平三年者子旂殘石正直殘石孔彪碑亦與真書近者至吳葛府君碑則純爲真書矣若吳之谷朗碑晉之郭休碑枳陽府君碑爨寶子碑北魏之靈廟碑弔比干文鞠彥雲志惠感鄭長猷靈藏造像皆在隸楷之間與漢碑之是吾三公山尊礎閣永光閣道刻石在篆隸之間者正同皆轉變之漸至可見也不能指出作今真書之人而能指出作漢隸者豈不妄哉八分之說議論紛紜蔡文姬述父邕

語曰去隸八分取二分去小篆二分取八分王愔曰  
王次仲始以古書方廣少波勢建初中以隸草作楷  
法字方八分張懷瓘曰八分減小篆之半隸又減八  
分之半又云八分則小篆之捷隸亦八分之捷蔡希  
綜曰上谷王次仲以隸書改爲楷法又以楷法變八  
分王應麟曰自唐以前皆謂楷字爲隸歐陽公集古  
錄始誤以八分爲隸東魏大覺寺碑題曰隸書蓋今  
楷字也洪邁以晚漢之隸書爲八分吾邱衍以秦權  
漢量爲秦隸未有挑法者爲八分比漢隸則似篆以  
石經爲漢隸有挑法者包慎伯曰凡筆近篆而體近

眞者皆隸書也中郎變隸而作八分八背也言其勢左右分布相背然也按王愔蕭子良謂上谷王次仲作八分衛恒云上谷王次仲始作楷法又敘梁鵠弟子毛宏始云今八分皆宏法按梁鵠已在魏時毛宏更後若毛宏始作八分則漢魏有挑法者石經等碑已備之矣若如包氏說中郎始變隸作八分則中郎之前王稚子闕嵩高銘封龍山乙瑛等碑已有挑法何待中郎變之且中郎勸學篇云王次仲初變古形則非邕可知也若如吾邱衍以篆未有挑法者爲八分則張昶八分碑乃即華岳碑衛覬金針八分書及

受禪表皆有挑法者若從王氏之說以今楷書爲隸書以漢人書爲八分斥集古謂漢人書曰隸爲誤則序仙記稱王次仲變蒼頡書爲今隸書則謂八分爲隸亦可是永叔亦不誤也王次仲作八分張懷瓘從序仙記以爲始皇時人王愔以爲建初時人蕭子良以爲靈帝時人雖不能辨而有挑法之隸起於安和之時亦必爲建初前人必非靈帝時人也然建武時三老尊槌郗縣石刻筆法已有漢隸體則次仲之作亦不可据張懷瓘書斷又云楷隸初制大範幾同後人惑之學者務益高深漸若八字分散又名之爲八

分高南阜八分說漢末伯喈始添掠捺八字左右而  
分布之是爲八分爲分別之分非分數之分也翁方  
綱隸八分考據此兩說引說文八字條八別也象分  
別相背之形並引𠂔字詹字𠂔字有八分義以爲必  
作分別分列解因攻齊胡公棺有隸爲僞諸家以八  
分先于隸爲謬又謂分劑分量分數之分玉篇扶問  
切在去聲二十三問禮記分無求多禮達而分定是  
也此字自古無讀平聲之理杜詩大小二篆生八分  
押平聲卽以分字音義論之其爲分布分列之分可  
無疑惑其說甚辨按古音無平仄之分離騷好蔽美

而傳惡與恐導言之不固哲王又不寤爲韵則以入聲之美惡讀爲去聲之好惡急就章萬方來朝臣妾使令漢地廣大無不容盛是以于以盛之之平聲爲去聲也則漢人無平去聲之別可知玉篇杜詩皆在沈約之後豈足據平原諸說之極紛而古今莫能定者蓋劉歆僞作篆隸之名以亂之也古者書但曰文不止無篆隸之名即籀名亦不見傳於西漢蓋今學家本無之惟時時轉變形體少異得舊日之八分因以八分爲名蓋漢人相傳口說如秦篆變石鼓體而得其八分西漢人變秦篆長體爲扁體亦得秦篆之

八分東漢又變西漢而增挑法且極扁又得西漢之  
八分正書變東漢隸體而爲方形圓筆又得東漢之  
八分八分以度言本是活偁伸縮無施不可猶王次  
仲作楷法則漢隸也而今正書亦偁楷程邈作隸秦  
隸也而東魏大覺寺亦偁隸八分可爲通偁亦猶是  
也善乎劉督學熙載曰漢隸可當小篆之八分是小  
篆亦大篆之八分正書亦漢隸之八分真知古今分  
合轉變之由其識甚通以兩漢碑攷之其次敘誠可  
見也又如今人以漢文爲散文以六朝爲駢文而六  
朝人又有文筆之異漢魏之間駢散莫分而與西漢



六朝少異既可上列於散文亦可下次之儷體隨時所稱以爲文字八分之說殆猶是歟中郎之說蓋當時今學家通稱但文姬述之不詳而爲古學篆隸所惑故亂之千載耳今爲別之自石鼓爲孔子時正文外秦篆得正文之八分名曰秦分吾邱衍說也西漢無挑法而在篆隸之間者名曰西漢分蔡中郎說也東漢有挑法者爲東漢分總稱之爲漢分王愔張懷瓘說也楷書爲今分蔡希綜劉熙載說也八分之說定篆隸僞名從此可掃除矣

說分第六

秦分

即小篆

以李斯爲宗今瑯琊泰山會稽之冢諸山

刻石是也相斯之筆畫如鐵石體若飛動爲書家宗法若石鼓文則金鈿落地芝草團雲不煩整截自有奇采體稍方扁統觀虫籀氣體相近石鼓既爲中國第一古物亦當爲書家第一法則也

李少溫以篆名一時自稱於天地山川衣冠文物皆有所得斯翁以後直至小生然其筆法出於嶧山僅以瘦勁取勝若謙卦銘益彤怯薄破壞古法極矣夫自斯翁以來漢人隸法莫不茂密雄厚崔子玉許叔重並善小篆張懷瓘稱其師模李斯甚得其妙曹喜

蔡邕邯鄲韋衛目覩古文

古文雖劉歆偽作然此非  
攷經學但論筆墨所出既

古亦不  
能廢

見間濡染莫非奇古少溫生後千年舊跡日

湮古文不復見於世徒以瘦健一新耳目如昌黎之  
古文陽明之心學首開家法斯世無人驟獲盛名豈  
真能過出漢人空前絕後哉漢人秦分書存於世者  
吾以寡陋所見尙二十餘種吳碑二種

趙王羣臣上壽

魯王泮池刻石

祝其卿墳壇題字

上谷府卿墳壇題字

少室神道闕

開母廟

三公山碑

是吾碑

建初殘石

孔宙碑額

衡方碑額

惠安西表

孔彪碑額

韓仁碑額

尹宙碑額

白石神君碑額

婁壽碑額

張遷碑額

譙敏碑額

樊敏碑額

魯王墓石人太守應君亭長題字

魯王墓石人府門卒題字

華山碑額

馮緄碑額

仙人唐公房碑額

中平殘石

范式碑額

上尊號奏額

受禪表額

天發神讖碑

封禪國山碑

蘇建書

大風歌

諸碑中蒼古則三公山妙麗則碑額奇偉則天發神  
讖雅健則封禪國山而茂密渾勁莫如少室開母漢

人篆碑祇存二種可謂希世之鴻寶篆書之上儀也  
大風歌傳爲曹喜作然不類漢人書以其爲黨懷英  
所白出故埒於末焉又州輔石獸膊有天祿辟邪四  
字體與谷口銅甬銘同凡諸篆雖工拙不同皆具茂  
密偉麗之觀誠瑯琊之嫡嗣且體裁近古亦有石鼓  
之意必毫鋪紙上萬毫齊力而後能爲豈如謙卦銘  
瘦骨柴立致吾邱衍以爲燒筆尖而作書哉

又秦漢瓦當文皆廉勁方折體亦螭扁學者得其筆  
意亦足成家

駘湯萬年瓦瘦硬絕倫都司空瓦微帶尖脚筆法亦

同嘗見漢谷口銅甬銘數十字瘦渾圓妙極矣陽水  
城隍謙卦實祖於是必師少溫者曷師此邪宗正官  
當亦似少溫者八風壽存綿繆虬糾幾開唐印之體  
然凡瓦當皆繆篆類應埒秦權漢量三公山碑之後  
也

漢鐘鼎文繆篆爲多太官鐘周陽侯銅丞相府漏壺  
慮僦尺皆扁繆惟高廟都倉孝成上林諸鼎則有周  
鼎意若汾陰好埒則肖秦權都倉則婉麗同碑額矣  
余以光緒壬午登焦山摩娑瘞鶴銘後問陶陵鼎見  
其篆瘦硬方折與啟封鐙同心酷愛之後見王莽嘉



量銘轉折方圓實開天發神識之先而爲涪臺銘之  
祖者筆意亦出於此乃悟秦分本圓而漢人變之以  
方漢分本方而晉字變之以圓凡書貴有新意妙理  
以方作秦分以圓作漢分以章程作草筆筆皆留以  
飛動作楷筆筆皆舞未有不工者也

凡漢分爲金爲石爲瓦有方有圓而無不扁密者學  
者引伸新體異態生意逸出不患無家數也

鐘鼎爲僞文然劉歆所採甚古攷古則當辨之學書  
不妨採之右軍欲引八分隸書入眞書中吾亦欲採  
鐘鼎體意入小篆中則新理獨得矣

吾以壬午試京兆中秋丁祭恭謁

文廟摩挲石鼓仰瞻

高宗純皇帝所頒彝尊十器乃始講識鼎彝南還遊揚州入焦山閱周無專鼎閭然渾古疏落欹斜若崩雲乍頽連山忽起爲之心醉及戊子再遊京師見潘尙書伯寅盛祭酒柏義所藏鐘鼎文以千計爛若雲錦天下之大觀也此學別爲專門今言書法略條一二以發學者意耳

鐘鼎亦有扁有長有肥有瘦章法有疏落有茂密與隸無異擇而採之亦河海之義也章法茂密以商太

己卣爲最古至周寶林鐘而茂密極矣疏落之體乃  
虫篆之餘隨舉皆然闕里孔廟器以商冊父乙卣爲  
最古焦山無專鼎亦其體楚公鐘奇古雄深尤爲傑  
作矣長瘦之體若楚曾侯鐘吳季子逞劍字窄而甚  
長極婀娜之致齊侯罍鐘銘銘詞五百餘字文既古  
渾書亦渾美詛楚之先驅也郭季敦魚冶妊鼎茂密  
匾美甚近漢篆壽敦蘇公敦體亦相同皆可用於秦  
分體者也正師戈字如屈玉又爲石經之祖若此類  
不可枚舉學者善用其意便可前無古人矣

自少溫既作定爲一尊鼎臣兄弟僅能模範長脚曳

尾體長益甚吾無取焉郭忠恕致有奇思未完牆壁  
黨懷英筆力驚絕能成家具自茲以下等於自檜明  
世分法中絕懷麓宗師謙卦蚓笛蛙鼓難移我情

國初猶守舊法孫淵如洪稚存程春海並自名家然  
皆未能出少溫範圍者也完白山人出盡收古今之  
長而結胎成形於漢篆爲多遂能上掩千古下開百  
禩後有作者莫之與京矣完白山人之得處在以隸  
筆爲篆或者疑其破壞古法不知商周用力簡故籀  
法多尖後用漆書故頭尾皆圓漢後用毫便成方筆  
多方矯揉佐以燒毫而爲瘦健之少溫書何若從容

自在以隸筆爲漢篆乎完白山人未出天下以秦分  
爲不可作之書自非好古之士鮮或能之完白既出  
之後三尺豎僮僅解操筆皆能爲篆吾嘗謂篆法之  
有鄧石如猶儒家之有孟子禪家之有大鑒禪師皆  
直指本心使人自證自悟皆具廣大神力功德以爲  
教化主天下有識者當自知之也吾嘗學琅琊臺嶧  
山碑無所得又學李陽冰三墳記栖先瑩記城隍廟  
碑庾賁德政碑般若臺銘無所入後專學鄧石如始  
有人處後見其篆書輒復收之凡百數十種無體不  
有無態不備深思不能出其外也於是廢然而返遂

棄筆不復作數年近乃稍有悟入處但以石鼓爲大宗鐘鼎輔之瑯琊爲小宗西漢分輔之馳思於萬物之表結體於八分以上合篆隸陶鑄而爲之奇態異變雜沓筆端操之極熟當有境界亦不患無立錫地也吾筆力弱性復懶度不能爲之後有英絕之士當必於此別開生面也

吾邱衍曰篆法扁者最好謂之螭扁徐鉉謂非老手不能到石鼓文字唐篆美原神泉銘結體方匾大有石鼓遺意李樞王宥謁岳祠題記吾甯取之浯臺銘浯溪銘參用籀筆戈戟相向亦自可人碧落碑筆法

亦奇不獨託體之古陽冰見之寢臥數日不去則過  
陽冰遠矣近世吳山子作西漢分體態樸逸駿駿欲  
度驂騑前矣若加奇思新意雖筆力稍弱亦當與頑  
伯爭一席之地

程蘅衫吳讓之爲鄧之嫡傳然無完白筆力又無完  
白新理真若孟子門人無任道統者矣陳潮思力頗  
奇然如深山野番獷悍未解人理左文襄筆法如董  
宣強項雖爲令長故自不凡近人多爲完白之書然  
得其姿媚靡靡之態鮮有學其茂密古樸之神然則  
學完白者雖多能爲完白者其誰哉

吾粵僻遠海濱與中原文獻不相接然藝業精能其天然勝工夫備可與虎卧中原抗衡上國者亦有其人吾見先師朱九江先生出其前明九世祖白岳先生諱完者手書篆隸結體取態直與完白無二始歎古今竟有暗合者但得名不得名自視世風所尚耳揔道人心無二徐遵明之指心爲師亦何異陸子靜哉但風尚不同尊卑迥絕耳道光間香山黃子高篆法茂密雄深迫真斯相自唐後碑刻罕見儔匹雖博大變化不逮完白而專精之至亦拔戟成隊此猶史遷之與班固昌黎之與柳州一以奇變備能一以



摹古擅絕亦未易遽爲優劣世人貴耳賤目未嘗攷古辨真雷同一談何足以知之番禺陳蘭甫京卿出於香山亦自雄駿也

杜工部不稱陽冰之篆而稱李潮吾邱衍謂潮卽陽冰人或疑之唐書宰相世系表雍門子長湜次澥字堅冰次陽冰潮之爲名與湜澥相類陽冰與堅冰爲字相類甫詩曰况潮小篆逼秦相而歐陽集古鄭漁仲金石略俱無潮篆其爲一人無可疑也

秦分體之大者莫如少溫般若臺黃帝祠字次則譙敏碑額字大漢寸六寸若曹喜大風歌字亦尺餘亦

秦分體之極大者但非漢人書耳

西漢分體亦有數種今舉存於世者別白箸焉其東漢挑法者詳本漢篇

秦權量刻字

魯泮池刻石

中殿刻石

建平鄆縣刻石

永光三處閣道刻石

開通褒斜道刻石

裴岑紀功碑

石門殘刻

郝閣頌

戚伯著碑

楊淮表紀

會仙友題字

右以篆筆作隸之西漢分食官鐘銘綏和鐘銘  
亦同魏太和石門摩崖由此體也北海相景君  
銘曳腳似天發神識漢鐸有永平二年者豐茂  
似郝閣亦可埒焉

三公山碑

是吾碑

天發神識碑

右以隸筆作繆篆亦可埒於西漢八分慮僂尺  
同王弼州曰夏承碑有四分之篆天發神識碑  
有五分之篆卽所謂八分書是也

三老碑

尊樾閣記

右由篆變隸隸多篆少之西漢分建武時之碑  
僅此

吾於漢人書酷愛八分以其在篆隸之間樸茂雄逸  
古氣未漓至桓靈已後變古已甚滋味殊薄吾於正

楷不取唐人書亦以此也

本漢弟七

眞書之變其在漢魏間乎漢以前無眞書體眞書之傳於今者自吳碑之葛府君及元常力命戎輅宣示薦季直諸帖始至二王則變化殆盡以迄於今遂爲大法莫或小易上下百年間傳變之速如此人事之遷化亦急哉自唐以後尊二王者至矣然二王之不可及非徒其筆法之雄奇也蓋所取資皆漢魏間瓌奇偉麗之書故體質古樸意態奇變後人取法二王僅成院體雖欲稍變其與幾何豈能復追踪古人哉

智過其師始可傳授今欲抗旌晉宋樹壘魏齊其道何由必自本原於漢也漢隸之始皆近於篆所謂八分也若趙王上壽泮池刻石降爲褻斜郝閣裴岑會仙友題字皆樸茂雄深得秦相筆意繆篆則有三公山碑是吾戚伯著之瓌偉至於隸法體氣益多駿爽則有景君封龍山馮緄疎宕則有西狹頌孔宙張壽高渾則有楊孟文楊統楊著夏承豐茂則有東海廟孔謙校官華豔則有尹宙樊敏范式虛和則有乙瑛史晨凝整則有衡方白石神君張遷秀韻則有曹全元孫以今所見真書之妙諸家皆有之

蓋漢人極講書法羊欣傳蕭何題前殿額覃思三月  
觀者如流水金壺記曰蕭何用退筆書裳大工此雖  
未足信然張安世以善書給事尚書嚴延年善史書  
奏成手中奄忽如神史游工散隸王尊能史書谷永  
工筆札陳遵性善隸書與人尺牘主皆藏去以爲榮  
此皆著於漢史者可見前漢風尚已篤好之降逮後  
漢好書尤盛曹喜

大風歌雖云膺作然筆勢亦可喜

杜度崔瑗蔡邕

劉德昇之徒並擅精能各創新製至靈帝好書開鴻  
都之觀善書之人鱗集萬流仰風爭工筆札當是時  
中郎爲之魁張芝師宜官鍾繇梁鵠胡昭邯鄲淳衛

覬韋誕皇象之徒各以古文草隸名家石經精美爲  
中郎之筆而棠谿典之外公羊末則有趙陲劉宏張  
文蘇陵傅楨論語末則有左立孫表諸人又武班碑  
爲紀伯允書郝閣頌爲仇子長書衡方碑爲朱登書  
樊敏碑爲劉惔書雖非知名人然已工絕如此又有  
皇象天發神讖蘇建封禪國山碑筆力偉健冠古今  
邯鄲衛韋精於古文張芝聖于草法書至漢末蓋盛  
極矣其樸質高韵新意異態詭形殊製融爲一爐而  
鑄之故自絕於後世晉魏人筆意之高蓋在本師之  
偉傑逸少曰夫書先須引八分章草入隸字中發人



意氣若直取俗字則不能生發右軍所得其奇變可想即如蘭亭聖教今習之爛熟致謂院體者然其字字不同點畫各異後人學蘭亭者平直如算子不知其結胎得力之由宜山谷曰世人日學蘭亭而欲換凡骨無金丹不知洛陽楊風子下筆已到烏絲闌右軍惟善學古人而變其面目後世師右軍面目而失其神理楊少師變右軍之面目而神理自得蓋以分作草故能奇宕也楊少師未必悟本漢之理神思偶合便已絕世學者欲學書當知所從事矣

右軍日子少學衛夫人書將謂大能及渡江北遊名

山見李斯曹喜等書又之許下見鍾繇梁鵠書又之  
洛下見蔡邕石經三體又於從兄處見張昶華岳碑  
遂改本師於衆碑學習焉右軍所採之博所師之古  
如此今人未嘗師右軍之所師豈能步趨右軍也  
南北朝碑莫不有漢分意李仲璇曹子建等碑顯用  
篆筆者無論若谷朗郭休熨寶子靈廟碑鞠彥雲弔  
比干皆用隸體楊大眼惠感鄭長猷魏靈藏波磔極  
意駿厲猶是隸筆下逮唐世伊闕石龕道因碑仍存  
分隸遺意固由餘風未沫亦託體宜高否則易失薄  
弱也

後人推平原之書至矣然平原得力處世罕知之吾嘗愛邨閣頌體法茂密漢末已渺後世無知之者惟平原章法結體獨有遺意又裴將軍詩雄強至矣其實乃以漢分入草故多殊形異態二千年來善學右軍者惟清臣景度耳以其知師右軍之所師故也

漢分中有極近今真書者高君闕故益州舉廉丞貫等字陽都字之邑旁直是今楷尤似顏清臣書吾既察平原之所自出而又以知學者取法之貴上也高頤碑爲建安十四年此闕無年月當同時故宜與今楷近張遷表頌亦可取其筆畫置於真書楊震碑經

縵如游絲古質如虫蝕尤似楷隸爲登善之先驅蓋  
中平三年所立亦似近今眞書者若吳葛府君碑直  
是正書矣惟樊敏碑在熹平時體格甚高有郿閣意  
魏元杰曹眞亦然眞可貴異也

子游殘石有拙厚之形而氣態濃深筆頗而駿殆張  
黑女碑所從出也又書法每苦落筆爲難雖云峻落  
逆入此亦言意耳欲求模範仍當自漢分中求之如  
正直殘碑爲字竅字辭字眞幾龍顏之祖可永爲楷  
則者也孔彪碑亦至近楷書熟觀漢分自得之

孔宙曹全是一家眷屬皆以風神逸宕勝孔宙用筆

旁出逶迤極其勢而去如不欲還馮君神道沈君神道亦此派也布白疎磔筆長

東海廟碑體漸匾闊然筆氣猶豐厚有郝閣之遺孔謙近之

尹宙風華艷逸與韓勅楊孟文曹全碑陰同家皆漢分中妙品曹全碑陰逼近石經矣

楊叔恭鄭固端整古秀其碑側縱肆姿意尤遠皆頑伯所自出也成陽靈臺筆法豐茂渾勁楊統楊著似之

楊淮表紀潤醇如玉出於石門頌而又與石經論語

近但疎蕩過之或出中郎之筆真書之變龍顏靈廟  
碑陰暉福寺所師祖也孔宙碑陰筆意深古昔人以  
爲如蟄虫盤屈深冬自衛真善爲譬者

帖中州輔碑兼雄深茂密之勝熹平殘碑似之又加  
峻峭也魯峻碑額渾厚中極其飄逸與李翁韓勅略  
同

婁壽碑與禮器張遷豐茂相似張壽與孔彪渾古亦  
相似耿勛與郝閣古茂亦相類

楊孟文碑勁挺有姿與開通褒斜道疎密不齊皆具  
深趣碑中年字升字誦字垂筆甚長與李孟初碑年

字同法余謂隸中有篆楷行三體如褒斜裴岑郃閣隸中之篆也楊震孔彪張遷隸中之楷也馮府君沈府君楊孟文李孟初隸中之草也

李孟初韓仁皆以疏秀勝殆蔡有鄰之所祖然唐隸似出夏承爲多王惲以夏承飛動有芝英龍鳳之勢蓋以爲中郎書也吾謂夏承自是別體若近今冬心板橋之類以論語核之必非中郎書也後人以中郎能書凡桓靈間碑必歸之吾謂中郎筆跡惟石經稍有依據此外華山碑猶不敢信徐浩之說若魯峻夏承譙敏皆出埶會至郃閣明明有書人仇紉范式有

青龍二年其非邕書尤顯益以見說者之妄也

自桓靈以後碑世多坳會爲鍾梁之筆然衛覬書受禪表確出於同時間人牟準之言而清臣季海猶有異談况張稚圭乎其按圖題記以孔羨碑爲梁鵠書吾亦以爲不爾夫乙瑛既遠出鍾前而稚圭題爲元常所書則孔羨亦何足信歟以李嗣真精博猶誤范式爲蔡體益見唐人之好坳會故以韓勅爲鍾書吾亦不信也

華山碑後世以季海之故信爲中郎之筆推爲絕作實則漢分佳者絕多若華山碑實爲下乘淳古之氣



已滅姿制之妙無多此詩家所薄之武功四靈竟陵公安不審其何以獲名前代也

景君銘古氣磅礴脚多用籀筆與天發神識相似蓋和帝以前書皆有篆意若東漢分書莫古於王稚子闕矣

吾歷攷書記梁鵠之書不傳尊號受禪分屬鍾衛然乙瑛之圖記既謬則孔羨之圖記亦非包慎伯盛稱二碑強分二派因以呂望孫夫人二碑分繼二宗亦坵會之談耳漢碑體裁至多何止兩體晉碑亦不止二種以分領後世之書未爲確論今無取焉

葉子侯碑淺薄前漢時無此體與庶孝禹碑殆是贗作字體古今真可一望而知余嘗見三公碑體近白石神君以爲三公山神君碑矣余意此不類永平時書既而審之果光和四年故字體真可決時代也夫古今風氣不同人生其時輒爲風氣所局不得以美惡論而美惡亦繫之漢書所錄張敞察昌邑王疏文選注所引劉整婢采音所供詞皆古樸絕俗爲韓柳所無吾見六朝造像數百種中間雖野人之所書筆法亦渾樸奇麗有異態以及小唐碑吾所見數百種亦復各擅姿製皆今之士大夫極意臨寫而莫能至

者何論名家哉張南軒曰南海諸番書煞有好者字畫遒勁若古鐘鼎款識諸國不同蓋風氣初開爲之先者皆有質奇之氣此不待於學也

今人日習院體平生見聞習熟皆近世人所爲暗移漸轉不復自知且目既見之心必染之今人生宋明後欲無蘇董筆意不可得若唐人書無一筆宋人者此何以故心所本無故即好古者抗心希古終抑挫於大勢故卑薄不能自由也譬吾粵人生長居遊於粵長遊京師效燕語雖極似矣而清冽之音助語之詞終不可得燕人小兒雖間有土語而清吭百嘖嘖

慙可聽閩粵之人雖服官京朝數十年者莫能如之  
爲文者日爲制義而欲爲秦漢六朝之文其不可爲  
亦猶是也若徒論運筆結體則近世解事者何嘗不  
能之

廣藝舟雙楫卷二

弟子林 奎陳和澤楊校  
弟子梁健康徐 勤覆校